

PM: Lawatan nilai kerjasama strategik Malaysia-Vietnam

Oleh **JUANI MUNIR ABU BAKAR**
juani.bakar@mediamulia.com.my

PETALING JAYA: Malaysia dan Vietnam akan menilai kerjasama strategik termasuk bidang halal dan pertanian sempena lawatan rasmi Perdana Menteri, Datuk Seri Anwar Ibrahim ke negara itu selama dua hari.

Anwar berkata, kunjungan itu memberi peluang kepada kedua-dua negara untuk menilai kerjasama terutamanya dalam pertahanan dan keselamatan, pendidikan dan pembangunan modal insan.

Perbincangan itu akan memperhalusi kemajuan pelaksanaan Pelan Tindakan 2021-2025 di bawah Kerangka Perkongsian Strategik Malaysia-Vietnam.

“Lawatan ini juga adalah sebagai pengiktirafan terhadap hubungan erat yang terjalin antara Malaysia dan Vietnam sejak lima dekad,” katanya dalam Facebook beliau.

Anwar yang ditemani isteri, Datuk Seri Dr. Wan Azizah Wan Ismail bersama delegasi tiba di Lapangan Terbang Antarabangsa Noi-Bai, Hanoi semalam.

Beliau disambut Menteri Kebudayaan, Sukan dan Pelancongan Vietnam selaku menteri pengiring, Nguyen Van Hung.

Lawatan rasmi itu adalah bagi memenuhi jemputan Perdana Menteri Vietnam, Pham Minh Chinh yang menjemput Anwar ke negara itu sewaktu Sidang Ke-



ANWAR Ibrahim diiringi Nguyen Van Hung sejurus tiba di Lapangan Terbang Antarabangsa Noi-Bai, Hanoi, Vietnam, semalam bagi mengadakan lawatan rasmi selama dua hari. - PEJABAT PERDANA MENTERI

muncak ASEAN di Labuan Bajo, Indonesia, baru-baru ini.

Selain bertemu pemimpin tertinggi Vietnam, Anwar akan mengadakan perjumpaan bersama komuniti perniagaan serta rakyat Malaysia yang menetap di negara itu sekali gus berpeluang berkongsi dasar dan aspirasi negara bersama mereka.

“Semoga lawatan ini dapat membawa manfaat buat kedua-dua negara, InsyaAllah,” katanya.

Semalam, Wisma Putra memaklumkan kedua-dua pemimpin dijangka menyaksikan pemeteraian memorandum kerjasama antara Dewan Perniagaan dan Industri Malaysia (NCCIM) dan Dewan Perniagaan dan Industri Vietnam (VCCI).

Selain itu, Anwar dalam lawatan itu akan mengadakan pertemuan dengan Presiden Vietnam, Vo Van Thuong; Perdana Menteri Vietnam; Setiausaha Agung Parti Komunis Viet-

nam, TYT Nguyen Phu Trong dan Pengerusi Dewan Rakyat Vietnam, Vong Dinh Hue.

Lawatan rasmi Perdana Menteri ke Vietnam selama dua hari bermula semalam adalah sebagai pengiktirafan terhadap kerjasama dan hubungan erat terjalin antara kedua-dua negara sejak lima dekad lalu.

Tahun ini adalah ulang tahun ke-50 penubuhan hubungan diplomatik antara Malaysia dan Vietnam yang terjalin sejak 30 Mac 1973.